

## Scola veglia – avon 140 onns

«Sunter quei ch'igl onn da scola 1883/84 ei staus finius, ha ei dau beinenqual malemperneivladad al cussegl da scola, essend che tut vul reger e cumandar e negin far. E sche quels che ston far, fan enzatgei, sche san ei buca adina far endretg a tuts e perquei vilentan ins e vegnan lura malemperneivladads neunavon, las qualas ein adina malvegnidas e per igl operar disfavoreivlas. Denton laian ins quellas d'in maun.»

Quella remarca el cudisch da protocols dil cussegl da scola ha svegliau mias marveglias ed jeu hai sfegliau pli detagliu els protocols da quei onn da scola. Alla radunonza da vischnaunca da Gliendisdis Tschuncheismas 1893 ei il suandont cussegl da scola vegnius eligius: sur Thomas J. Berther, caplon a Sedrun sco president. Ils ulteriurs commembers ein: Lezi Anton Huonder da Sedrun, Hans Giachen Decurtins da Sedrun, Gion Andriu Berther da Camischolas, Gion Antoni Caveng da Rueras, Fidel Wenzin da Selva e Thumaisch Schmet da Cavorgia.

### Las personas d'instrucziun

Sco scolasts fuvan eligi pigl onn da scola 1883/84:

|              |   |
|--------------|---|
| Sedrun:      | signur scolast Anselm Capeder da Mustér, cun ina paga da 344 frs.   |
| Camischolas: | signur scolast Sigisbert Monn da Mustér cun ina paga da 340 frs.  |
| Cavorgia:    | signur scolast Joseph Steiner cun ina paga da 340 frs.  |
| Rueras:      | ein buca vegni perina e suenter liungas e macortas malemperneivladads han ei lura pladiu ils 6 da matg (di da cumin) puspei il veder signur scolast Gion Battesta Derungs da Breil per 340 frs. |
| Selva:       | signur scolast Duri Riedi da Rueras, cun ina paga da 340 frs.   |

La scola tudestga ha scolast Gion Antoni Soliva instruiu cun ina paga da 340 frs. ed Eleonora Cavegn da Sedrun ha surpriu la scola da lavur. Il vischinadi da Rueras ha buca vuliu ina scolasta da scola da lavur.

### Casa da scola

Gia pliras gadas fuva la vischnaunca vegnida admonida dil cantun da baghegiar ina nova casa da scola pil vischinadi da Sedrun. La veglia sin plaz Cadruvi fuva daventada absolutamein insufficienta. Las autoritads communalas han buca fatg bia stem da quella admoniziun e concludiu da baghegiar per cul els stoppien veramein. Il caplon noda: *“Schegie che mintga carstgaun cun sauna raschun, stueva veser en ch'ei era necessari, muort fetg biaras raschuns da baghegiar ina casa.”*

### Ils protocols plaidan

Ils 18 d'uost 1883 ha il cussegl d'educaziun cantunal tarmess in memorandum. En quel stimulescha ed obliquescha el il cussegl da scola da luvrar en favur d'ina nova casa da scola. Il president dil cussegl ha purtau quei sin vischnaunca e lezza ha eligiu ina cumissiun consistenta ord il cussegl da scola ed ils suandonts umens: Vigieli Deragisch da Bugnei; Giachen Antoni Soliva da Sedrun; Bruno Soliva da Gonda; Gion Paul Berther da Camischolas; Giachen Antoni Wenzin da Rueras; Wigieli Wenzin da Selva; Sep Antoni Hendry da Surrein; Luis Hendry da Cavorgia. Quella cumissiun ha da luvrar ora in pareri nua tschentar la scola e co far quella.

Ils 14 d'october 1883 seraduna il cussegl e concluda d'entscheiver la scola romontscha ils 24 e la tudestga ils 26 d'october. Plinavon duei vegnir lavau en la scola e quintau per lavur cumina. Duront la stad han entgins umens garegiu che la vischnaunca fetschi la lenna per scaldar la scola, aschia pretendi la lescha. Il

president dil cussegl ha purtau quei sin vischnaunca, mo negiu ha vuliu vegnir ora cul marmugn ed ei vegn concludiu da schar sco igl ei stau tochen dacheu.

Ils **24 d'october** ha la scola entschiet e plirs dil cussegl ein stai presents. La scola da Sedrun dumbra 42 scolars. A Rueras ein tuts scolars cumpari el diember da 30 affons. Il nuder remarca: *"Buca fatg ina buna impressiun sin mei, negina vivacitad, "eintönig" ed "unpractisch."* A Camischolas frequentan, sco igl onn vargau, 14 affons la scola.

Ils **26 d'october** ei la scola tudestga vegnida aviarta cun diesch scolars, quater muncavan. Ils affons han fatg ina buna impressiun sils representants dil cussegl cul meini che quei vegni ina pulita scola. Il caplon ha garegiu e cumandau ch'ei vegni plidau tudestg denter ils affons dil secund e tierz onn e quei stoppi vegniur executiu.

Ils **27 d'october** ha giu liug l'emprema sessiun pervia dil baghegiar ina casa da scola a Sedrun. La damonda essenziala ei quella: *"Nua ch'ei seigi bein il pli adattau plaz per baghegiar ina casa da scola a Sedrun, sina quei che las scolas da Sedrun e Camischolas savessien vegnir unidas."* Quella damonda ha leventau ina gronda discussiun e bia meinis ein vegni purtai avon. Ils ins levan baghegiar la casa a Camischolas e concentrar leu tuttas scolas, aschi per l'entira vischnaunca. Auters levan tschentar la scola a Mira, aschia vessien ils affons da Camischolas in pli cuort viadi, era muort il ruh unviern. Lu deva ei aunc la gruppa che leva baghegiar a Sontget, giudem Gonda da maun sut dalla via. Quei fussi il pli adattau liug cun risguardar ils affons da Bugnei e Surrein. Plinavon stoppien era las suandontas caussas vegnir risguardadas cu ins vegli baghegiar ina scola:

- La scola duei esser cun la baselgia
- Igl affon duei far termagls sut survigilonza
- Ins sappi buca metter si la grevezia als spirituals d'ira en Camischolas, ni Mira a far ductrina
- Muort l'aua
- Muort scaldar pegna etc. etc.

Suenter in liunga debatta vegn decidiu cun endischs vuschs encunter ina da tschentar la scola a Sontget.

Ils dus representants da Camischolas remarcen, che quei dueigi esser negin pregiudezi a lur vischinadi e ch'els vegnien mo stuend ni zunghegiar a Sedrun cun lur affons.

Ussa setschenta la damonda: Co ni tgei lein baghegiar vi Sontget?

La secunda sessiun vegn tenida ils **4 da november**. Il meini general ei da baghegiar enzatgei scoiauda che duei survir pil general, ton per las scolas sco era per auters basegns dalla vischnaunca. Ina part leva unir cun la casa aunc la habitaziun per la caplania. Ei dessi la pusseivladad da vender la veglia casa da scola a Cadruvi, baghegiada 1848 e trer in grond daner. Auters levan buca quei, lu vegni quei ina memia gronda casa e cuosti era bia ed ins sappi buca baghegiar ferm avunda.

La cumissiun anfla per bien da schar decider quei la radunonza da vischnaunca.

La casa da scola duei secumponer dallas suandontas stanzas:

1. Giufuns ina stanza per far il "turnen"; davostier tschalers.
2. Emprema alzada: da maun sut duas stivas per las scolas romontschas. Davostier ina stanza per la sprezza e duas talinas per lenna ni duas combras, secund sco ei drova.
3. Secunda alzada: da maun sut ina stiva per la scola tudestga, ina per il "Civilstand" ed ina per igl "Oberkeit" da vischnaunca. Davostier ina cuschina ed ina combra per il scolast e lura aunc igl arsenal per disposiziun dil gerau militar.

Ina part dalla cumissiun leva aunc baghegiar ina tiarza alzada per la caplania. Denton ha la cumissiun concludiu da schar purtar avon alla vischnaunca omisduas proposiziuns, sinaquei che quella sappi decider. La damonda da baghegiar ord crap ni lenn, ha la cumissiun era schau sura da decider la vischnaunca.

Treis dis in in suenter l'auter, dils **6 tochen ils 8 da november**, vegn inspectau las scolas ensemen cun inspectur Disch. Ils 6 avonmiezdi ha quella giu liug a Selva, suentermiezdi a Rueras. Al scolast ei vegniu fatg la remarca da sepertgirar da dar si memia bia a casa. Ei vegn pretendiu che affons che frequentan la scola romontscha, da buca visitar la scola tudestga dalla sera. Quei seigi memia stregn. Igl inspectur fa attents che la scola da Rueras drovi ina scolasta per la scola da lavur per las buobas. Ils 7 da november ein plirs signurs dil cussegl serendi a Cavorgia e leu ei il scolast vegnius admonius da metter pli bia peisa silla grammatica. Suentermiezdi ha la scola da Camischolas giu la honur dall'inspeziun. Ils 8 avonmiezdi ei la scola romontscha a Sedrun vegnida visitada e suentermiezdi la tudestga ed alla fin aunc la scola da lavur. En tuttas scolas ha signur inspectur fatg attents ch'ins dueigi sepertgirar dallas absenzas.

La radunonza da vischnaunca dils **18 da november** ha manegiau che quei drovi tuttavia buca in aschi grond baghetg e cun aschi bia cuosts. La cumissiun dueigi serimnar e turnar a ponderar aunc inaga.

Ils **29 da november** vegn il scolast da Rueras citaus avon il cussegl da scola. Tenor repatidas lamentaschuns dils geniturs, tracteschi il scolast memia groppamein e maltschecamein ils affons. Suenter ver tedlau las raschuns ed exculpaziuns da signur scolast e suenter quei che signur Gion Antoni Caveng, el num dils vischins, ha era giu mess avon sias lamentaschuns, ha il president renviau anavos tuttas exculpaziuns e per part aunc manzegnans da signur scolast. El ha dau ina scharfa admoniziun e garegiu absolutamein, ch'el cali si da tractar ils affons sin quella moda, numnadamein da trer per las ureglias, per il nas e cavels, ch'ei seigi il saung.

Il medem di ha la cumissiun da baghegiar aunc giu sessiun pervia dalla casa da scola. Ils umens ein vegni suenter als giavischs dalla radunonza da vischnaunca e luvrau ora in niev rapport. Plinavon decida la cumissiun da buca ir cun la caplania a Sontget e schar la scola veglia per different diever e basegns dalla vischnaunca. Tonaton duei vegnir baghegiu a Sontget enzatgei scoiauda. Ulteriuramein ei vegniu decidiu da baghegiar las medemas stanzas sco stau concludiu, mo dau auters nums.

Ils **16 da december** approbescha la vischnaunca il niev project per la scola ed elegia ina cumissiun da treis commembers: sur caplon Thomas Berther, sco president, signur Gion Andriu Berther e Duri Berther, Zarcuns, meister, e surdau a quella tut il menaschi.

Ils **19 e 20 da december** ein las scolas vegnidas visitadas ed anfladas per cumpleina cuntentientscha, cun excepziun dalla scola da Rueras, che veva ussa era ina scola da lavur.

Ils **10 da schaner 1884** ein ils treis commembers responsabels pil baghegiar la scola seradunai a Sedrun. La lenna duei vegnir pinada il fevrer. Pertuccont il plan ein ins insumma buca vegni perina. Il caplon garegia ch'ei stoppi vegnir fatg in plan, ch'ins sappi tgei ch'ins vegli e tgei ch'ins hagi da far. Ei vegn concludiu da prender cussegl tiegl inspectur Disch.

Suenter liunga e viva debatta eis ei vegniu concludiu da ver plaid e cussegl en quella caussa cun signur inspectur Disch.

Ils **23 da schaner** ha giu liug la visitaziun generala dallas scolas. La scola da Rueras ha finalmein fatg ina buna impressiun. A Camischolas ha quei di aunc giu liug ina conferenza dils scolasts. La scola ha cuntentau tuts. Era ils signurs scolasts ein stai cuntents cun la moda e maniera che signur scolast Sigisbert Monn applichescha e dau ad el tut laud.

Al president eis ei vegniu fatg la reproscha, ch'el seigi buca staus vid il conclus prius gl'onn vargau da schar prender atras a quella conferenza mintga ga mo in "fach", aber quel scoiauda. Quel ha aber renvieu anavos quella reproscha, essend ch'el hagi alla entschatta dumandau si ils signurs scolasts, tgei che plagi da schar prender atras. Alla fin esi ei lura aunc vegniu purtau avon ina lavur: "*Enzatgei sur l'educaziun entras la scola*" da signur scolast Gion Battista Derungs. Quella lavur ei stada luvrada ora cun tut "flis" e premura ed ha cuntentau zun fetg tut ils presents. Nuotatonmeins han certs principis, ils quals eran tschentai si en quella lavur, leventau ina viva debatta, la quala ha mussau ora che signur scolast Derungs, seigi buca sin la dretga via. Unitamein eis ei vegniu engraziu a signur scolast Derungs per sia biala e fetg instructiva lavur.

La scola romontscha a Sedrun ha ils **24 da schaner** anflau tut laud entras il cussegl. Era la tudestga ha cuntentau il cussegl da scola. A Selva e Cavorgia ein las scolas medemamein vegnidas anfladas cun bunas relaziuns e cuntentau tuts.

Ils **7 ed 8 d'avrel** han giu liug ils examens finals.

Selva: La scola ha cuntentau fetg e scolast Riedi ei puspei vegnius pladius.  
Rueras: Examens fetg schliats. Muort siu grop secuntener encunter ils affons, han ils geniturs buca vuliu pli il scolast.  
Cavorgia: Scolast Sigisbert Monn han ei turnau a pladir per 340 frs.  
Sedrun: Ils examens han cuntentau zun fetg, scadin cass la megliera scola da tuttas. Scolast Capeder ei vegnius pladius per 440 frs.

**Aschia fuss igl onn da scola 1883/84 finius. Igl ei stau en general in bi onn, malgrad enqual malemperneivladad ch'il president dil cussegl da scola ha da star ora. – Curascha ed energia e lura va ei.**

**Thomas J. Berther**